



**Mir wärded älter, aber nid chälter !!**



**Zum Schpiegelbild da visavü, sägi: „bitte käni sie !?!?“  
Si würked mir so unvärtraut, was händs i ihrem Gsicht nu baut,  
oder sind si Frau vom Mond, det isch mär sich so Krater gwohnt,  
und gsehni erscht dä ganze Body rüefi luut : „läck mir am Fudi !!“  
ja s’Läbe isch nid immer nett, vor allem so diräkt vom Bett,  
susch chani eigentli nid chlage, doch öpedie da git’s so Tage,  
da zwickts und zwackts nid nu im Gsicht, vilicht isch’s Reuma oder Gicht,  
susch da bini würkli gsund, nu dä Buuch isch ä chla z’rund,  
däbii bin ich doch underwägs, wie dä Bese mit dä Häx,  
im Wald da tueni gärn marschiere, doch leider ebeso diniere,  
und 1,2 gueti Gläsly Wy, häts halt mängisch au däbii,  
doch Kalorie simir Schnurz, für das isch s’Läbe eifach z’churz!!  
Weisch nie wie lang bisch na däbii, dänn frögsch di isch das alles gsii !?!?  
nei, das wili eifach nöd, das gfallt mir nid, ich findes blöd,  
dä ganz Tag nume Chörndli picke, bim Lagerfäld bifällig nicke,  
ja nie z’luut lache oder soo, susch chöntid d’Lüüt na Aaschooss nää,  
immer schön bescheide bliibe, als Grufti, ja käi Blödsinn triibe,  
das wär ja würkli unerhört, weiss die dänn nid was sich so ghört !?!?  
die söll gfälligscht d’Schnurre halte, bim Auto nüme sälber schalte,  
überhaupt die Räntnerschaar isch ä unerhörte Gfahr,  
väschepered andre Lüüt dä Platz, händ im Alter na än Schatz,  
däbii da weiss doch gross und chly, mit Sex isch äs scho lang vərbii !!!  
doch ich säge eu jetzt ehrli, das isch ä riisegrosses Märli,  
Heerschaare woked umenand, sind unterwägs i Schadt und Land,  
Chrüüzfahrte sind dä grosse Ränner, Wyseminar für bsundri Känner,  
Änglisch oder Russisch lehre, im Internet tüends au värechere,  
und mit Aktzie chly jonglire, schpitzemässig go diniere,  
doch wäni alles säge wett, chämtid mir hüt nüm is Bett,  
ich finde s’Räntner sii ganz toll, mega super wundervoll,  
doch öpedie da föhl mi au, scho ä chly als alti Frau,  
dä Rugge schmärzt, dä Halux brännt, mä mues chiüüche wämer rännt,  
was hani nu scho wieder wele, bim Gält da tueni mi värzele,  
und d’Auge sind au nüme das, sitzt käi Brüle uf dä Nas,  
au s’Reise tuet mi ä chly schtresse, hani würki nüüt väreässe,  
langets sicher uf dä Zug, und chlappets ä na mit äm Flug,  
s’flirte hani chly värlehrt, s’git Tage, da lauft alls värechert,  
zum Glück sind’s i dä Minderzahl, wärs nid ä soo wär das fatal,  
und luegi zruugg so uf mis Läbe, chani eigentli nu säge,  
s’isch gsii wie uf dä Achtibahn, s’hät öppe gwälet i dä Kahn,  
doch meischtens isch äs richtig gloffe, ha wunderbari Mänsche troffe,  
än guete Schtärn dä hät mich gleited, Fründe immer treu begleited,**

**und wie au s’Läbe wiiters chunt, ich hoff äs bliibi froh und bunt !!**

